

J. J.

DISSERTATIO  
MEDICA INAUGURALIS  
DE  
VERTIGINE,

QVAM

SUB AUXILIO DIVINO

AMPLISSIMÆ FACULTATIS MEDICÆ INDULTU  
IN PERANTIQUA ET ILLUSTRİ ERFURTINA

P R Æ S I D E

VIRO AMPLISSIMO, EXCELLENTISSIMO  
ATQVE EXPERIENTISSIMO,

DN. CASPARE  ramer/  
MED. DOCTORE, ANAT. ET CHYM. P. P.


CELEBERRIMO, ET FACULTATIS MEDICÆ  
ASSESSORE GRAVISSIMO,

DN. PATRONO & PROMOTORE *Suo omni observantiâ colendo,*  
P R O

L I C E N T I A

SUMMOS IN ARTE MEDICA HONORES, INSIGNIA atque  
PRIVILEGIA DOCTORALIA ritè impetrandi

*Solennem Sympliciatorum Disquisitionem*  
subire faciet

JOHANNES HENRICUS  ihn/

ARNSTAD. THURING.

In Medicorum Auditorio,

*Ad diem 5. (15.) Decembr. Anni clc lcc LXXXI.*

Horis consuetis.







J. J.



Consideranti mihi sæpiùs, in quantum animalis vita, imò totius hujus Universi subsistentia à motu dependeat, & quàm ferè nihil præter perennem particularum motum existat: Ingens animum admiratio haud immeritò subiit, cogitantem, quòd inter omnes motus animali nullus adeò infestus, quàm circularis iste, qui circa proprium axem contingit, observetur. Meritissimò jam alibi BALLONIUS: *Admiranda est, inquit, Divine Sapientie vis & abyssus inexplicabilis: cùm homo sit cœlestis, caput sphericam habeat formam, magnaue pars membrorum rotunditatis venustate gloriari possit, cur motus sphericus homini noceat?* (Velut is citatur apud ROLFING. *Metb. cogn. aff. part. cap. diff. 6. p. 14.*) Quorsum insuper addi fortè potest, quòd omnis, qui in animalibus, ab ossibus dependere observatur, motus progressivus, quasi circulariter & circa proprium suum centrum peragatur; sic enim v.g. dum homo progreditur, (ut rectè annotavit du HAMEL *Pbys. part. 2. tr. 2. disp. 1. p. 118.*) femur cum reliquo trunco in coxendice; crus cum femore in poplite; cum crure talum, qui cum calce &c. arcum certum tanquam ex centro formare deprehendemus: adeoque gressum hominis, & omnium pedibus instructorum animalium, nihil aliud, quàm motum ex variis circulorum portionibus super diversa centra compositum esse. Interim tamen mirum cogitatu, in homine, si vel tantisper circulariter aut moveatur, aut moveri se patiatur, nisi admodum asævetus jam sit, magnam illam & supremam machinæ suæ corporeæ rotam (uti Illustri BACONI de VERULAMIO *hist. vit. & mort. p. 568. audit*) spirituum nempe systema usque adeò confusione vertiginosâ turbari posse, ut functiones non tantùm sensitivæ, sed non parùm sæpè ipsæ etiam locomotivæ nullatenus sibi consentiant, nec munia sua ritè exequantur. Quin, quod admiratione pariter dignum, in homine, longè frequentius, quàm in brutis reliquis vertiginosum hoc ma-



lum observamus : Ut ut enim ex istis plura, si vel percussa, vel alias morbo affecta sint, aliquamdiu in gyrum circumire, & deinde in terram verè interdum moribunda decidere, interdum finito paroxysmò morbosò & quasi epilepticò ad se iterum redire non raro videamus : talem tamen Vertiginem, quæ à circumgyratione corporis nasceretur, non adeò obviam, aut certè non adeò contumacem, quin levi consuetudine expugnari possit, deprehendimus, sed potius canes v. gr. brevi tempore assefactos aliquoties in gyrum circumagi posse, citra tamen manifestam sensus & motus spontanei læsionem vulgò constat : nisi fortè hanc rationem subesse suspicari convenit, quòd talis eorundem circumgyratio non tam circa axem corporis sui contingeret, quàm saltem circumeurstationis brevissimæ speciem quandam referret : Cui dissimile in iis evenit brutis, quæ caput & collum reverà aliquandiu hinc inde proximè in gyrum circumagere apta nata sunt, uti ex illo vulpis cujusdam stratagemate (siquidem vera sunt, quæ WILLISIUS nuntiari sibi passus est, prout de anim. brut. c. 6 p. 54. testatur) colligere licet, dum is gallum Indicum arbori insidentem diuturnà ac celeri circum arboris truncum cursitatione, & aspectu simul in eum firmiter directo, ad continuam capitis sui circumductionem ( ut nempe ipsum circuitus facientem usque intuitu assequeretur ) obligavit, donec tandem exin Vertigine affectus è sublimi in fauces hostis sui corrueret. Quicquid hujus sit, homines certè huic Vertiginis malo longè promptius, & à causis multò pluribus, quàm bruta reliqua obnoxii, medicorumq; auxiliorum indigi observantur. Qualia cum nunc Amplissimæ FACULTATIS MEDICÆ indultu, loco Speciminis Inauguralis, quoadusque per ingenii modulum licebit, exponere aggrediar : Ante omnia D E U M ter Optimum Maximum ardentibus suspiriis precor, ut læ cœpta mea, pro Sanctissimæ Voluntatis Suæ beneplacito, secundet.

§. 1.

**V**ERTIGINIS nomen uti apud Latinos à *vertendo* derivatum est, ita sine dubio ad communissimam & præcipuam illius speciem eò ipsò respectus habetur, in quâ objecta visus omnia circumverti atque in gyrum agitari videntur, cum ali-

às cui-



his cuivis rei in circulum motæ, e. g. ventis, aquæ, rotis, & similibus applicetur. Apud Græcos autem diversis nominibus insignitum deprehendimus: *Δῖνος* enim *ἀπὸ τῆς δινεῖσθαι*, quod est circumagi, dicitur; item *σκοτώμα* *ἀπὸ τῆς σκοτέε*, à tenebris: quod nomen illi præcipuè convenit, ubi præter circumgyrationem, aut tremulam saltem objectorum inconstantiam confusa insuper, & tenebricosa visio accedit: quò & HIPPOCRATIS *σκοτόδινος aphor. 17. IV.* respicere videtur: nam utut vocem *ἰλλίγγη*, quâ aliàs sæpiùs idem utitur, HEURNIUS in *Aphorismis*, pariter ac illam, semper per tenebricosam vertiginem expresserit, videtur tamen hæc ultima, cum ab *ἰλλίγγη*, quod vortex est, ex *ἐιλέω*, verto, qf. *ἐίλιγγη*, derivetur, Vertiginem genericè magis indigitare, & huic non minùs, quàm illi etiam speciei competere posse; cum quâ etiam interpretatione SENNERTO nonnihil convenit *Instit. l. 2. P. 3. S. 1. c. 9. p. m. 334.* Germanis dicitur *der Schwindel*.

§. 2. Est autem Medicis Vertigo actionis imaginativæ præcipuè circa visionem occupatæ talis depravatio, quâ objecta omnia nunc tremula & velut undulantia: nunc in gyrum circumacta: aliquando ceu tenebris simul obscurata: imò interdum etiam varii oculis colores & scintillulæ observari confusè videntur, à spirituum animalium motu quasi circulari, variegue intercepto, quandoque etiam interioris oculi nonnihil convulsivo, oriunda. Quæ ipsa ut evidentiora nobis fiant, operæ pretium erit, è Principiis Physiologicis de negotio visionis brevia quædam & ad scopum nostrum saltem accommodata, huc accersere, ut sic è naturali motûs objectorum, quæ visu peragitur, perceptione quoad licebit cognitâ, ad præternaturalis hujus scrutinium faciliior via adaperiatur.

§. 3. Eum in finem primò integram organi visionis, quod sine omni controversia oculus existit, mirabiliter coagmentatam structuram, omnemque ipsius musculorum, glandularum, vasorum, nervorum, tunicarum, humorumvé historiam ex Anatomico studio repetendam hîc præsupponimus. Quemadmodum autem in cujuslibet sensûs exercitio bini actus occurrunt, quando nimirum primò objecta sensibilia ab organo recipiuntur, deinde ve-



ro ab animâ sensitivâ variè hinc affectâ percipiuntur : Ita in nostro hoc sensu accuratioribus Seculi hujus Physiologis persuasum est : Primò, objectorum visibilium figuras mediantibus lucis radiis, in corporum superficiaria textura variè priùs reflexis atque refractis, ad modum camerae sic dictae obscurae, in oculi fundo depingi : exin sensûs, uti vocant, communis & phantasiae ultimam dignotionem subire.

§. 4. Quaecunque enim in notissimo isto Camerae obscurae apparatu, eadem & in oculo, sed perfectiora adhuc, reperiuntur. Postquam intra corneam tunicam contentum pellucidissimum humorem, in quo aliqua saltem utilis radiorum prævia refractione contingit, sub uveæ, quod pupillam dicimus, illo foramine, elegantissima & sincerissima crystallini humoris, intra araneam suam in convexam figuram coacti lens ordinata est, quam radii post insignem refractionem emensi, vitreum accedentes ibidemque ulterius fracti, se in conum colligunt, & mutuò intersecant, donec tandem progressi in circum ambientis retinae nervosos parietes allidant, & imagines objectivas appingant, quas etiam si retina ad fundum oculi è regione pupillæ, tunicâ corneâ & choroide demptis, disoperiatur, in oculis cadaverum ipsis oculis nostris elegantissimo spectaculo videre licet. Id quod experimentum est PECQVETI descriptum in *Ephem. Gallicis Ephem. VII.*

§. 5. Rectè autem perfectiora, quæ in oculis sunt, illis, quibus Camera ista obscura instruitur, dixi. Taceo humoris crystallini lenticularem formam in superficie antica exquisitissimam, cum artificiali lenti multa incommoda, tum ex materia, tum ex elaboratione quoque, utut cæterum curatissimâ, inevitabiliter penè adesse soleant : Sileo posterae partis inimitabilem figuram hyperbolicam, in cujus simili fabricanda adhuc dum frustra ingeniosissimi etiam artifices sudant. Hoc notatu non indignum est lentes oculorum ciliari cinctas ligamento, hujus & choroidis motricibus fibris expeditissimè & temporis momento conglobari, complanari, ad retinam propius trahi & relaxari posse, prout nempe ob viciniam, aut distantiam objectorum è re fuerit. Imò accedit, quòd probabilissimum videatur, ad illius variationis normam, quam humoris crystallini convexitas pro rei exigentia experitur, vitreum quoque



quoque semper humorem, In talem figuram simul componi, ex qua illius retinæ fundi, quo imagines excipiuntur, homocentrica ferè ad crystallinam lentem concavitas perpetuò resultet; adeoque in Oculo idem, quod in ingenti illo, quem Maximilianus Archidux fabricari fecit, globo, contingat: In quem introgressi, ut ait SCHEINERUS, *admittebamur rerum externarum per lentem convexam in parietem concavum species, quæ ob id ipsam longè ordinatius & ampliores videbantur, & distinctius compositæ, quam si in superficiem aliquam planam allapse essent*: Prout is citatur apud JOH. BAPT. du HAMEL, *Phil. vet. & nov. Tom. III. Phys. P. 2. Tr. 2. Disp. 2. Quest. 2. p. m. 145.*

§. 6. Quæ nos demum à visibilibus radiis tunicam oculi intimam pati diximus, ea contra DN. MARIOTTE, Abbas Divionensis, in choroide tunica proximè substrata, neglectâ hâc, peragi existimavit, eo præcipuè motus experimento, quod, si binæ rotundæ chartulæ parieti cuidam ad oculi altitudinem ita affigantur, ut ab invicem ad ulnæ spatium, vel amplius, distent; altera tamen, quæ ad dextram nostram est, ad tres vel quatuor circiter digitos deorsum magis collocetur: Tunc, si, Oculo sinistro clauso, dextro altiore rectè intueamur, ut tamen & depressior simul videatur; sicque ab ipsis pedetentim ad passus aliquot retrogre diamur: Fiet, ut intra certum quoddam spatium eadem depressior planè dispareat, longiusque dein recedentibus mox denuò sistatur: Eamque chartæ evanescentiam tum contingere observavit, quando imago ejus nervum opticum attingeret: Quod fieri utique non deberet, si imaginum receptio in retina terminaretur, quâ non tantum universam interiorem oculi post crystallinum cavitatem, & sic nervum opticum quoque succingeret: sed & hujus velut expansio & medulla ad instar floris explicata videretur: Quemadmodum hæc omnia latius deducta videri possunt in ipsius Epistola ad Pecquetum, *Actis Phil. Anglic. insertâ Anno 1667. num. 35. p. m. 554.* In ejusdem DN. MARIOTTE sententiam plenè concessisse videtur du HAMEL *c. l. disp. 2. quest. 1. p. 138.* qui cum multis argumentis penè demonstrare ait, tunicam choroideam, quæ retinæ substernitur, proprium visus organon esse: Quod ea tunica (ait) *piæ matris quædam productio sit, ex infinitis penè fibrillis com-*



posita : cùm in retina nullæ sunt ejusmodi fibrillæ , imò nec membra-  
na dici possit , sed humor potiùs ex intima nervi optici substantia con-  
cretus : Sic neque opaca sit ut choroides , sed non nihil traluceat &c.  
Posthæc idem superiùs à nobis jam relatum experimentum cum  
errore quodam , ut videtur , p. 139. allegat : Charta , ait , in or-  
bem secta , & parieti ad oculi altitudinem affixa ex certa distantia sub  
obtusum non cadit , cùm partes vicinæ hinc inde videantur. Cum  
scilicet locus imaginis in ea parte choroidis , quæ deficit , seu in basi nervi  
optici existit : Lumen enim basin illius nervi non afficit : Unde ob-  
jectum coràm positum non cernitur. Quæ certè si intelligenda sunt ,  
prout verba jacent , de una & simplici charta , in quam ( cùm de  
alio nullo dicatur ) obtusus omnis dirigendus est , experimentum  
nullo prorsus modo succedet : Cum & unus saltem oculus , &  
ambo , ( cui rei pariter hîc cautum non est ) quodcunque objectum  
constanter intuentur , illud quoque utili & quasi receptivâ sui par-  
te perpetuò sequi jam nimis sint assueti.

§ 7. Verùm quicquid hujus sit , utut fortè totum hoc nego-  
tium , quod dicto du HAMEL longiorem disquisitionem postulare  
videtur , negligere potuissimus , cum parùm nostra hoc in loco  
referat , in choroidene tunica , an in retina , pro quâ tamen supe-  
riùs laudati Pecquetiani experimenti fides militat , radii luminosi  
terminentur ; malimus tamen , retinæ vota nostra cum  
PECQUETO concedere , qui evanescentiæ illius rationem , in Re-  
sponsione ad DN. MARIOTTE (velut ex Act. Anglic. l. c. constat)  
in vasorum multitudinem , retinæ tunicæ cò loco , quò nervi opti-  
ci insertio est , intertextorum rejicit. Id quod autem Dn. Doctori  
Præsidi , Promotori omni observantia colendo nondum satisfacit ,  
qui utriusque oculorum bulbi quandam obliquitatem & inclinatio-  
nem versus nares propensam observavit , ideo per necessariam ,  
quod de quovis puncto optico radii in utrumque oculum non nisi  
per modum anguli , adeoque obliquè illabi queant. Ut hinc dex-  
tro oculo objecta quæ sinistrorsum , sinistro quæ è contrâ posita , &  
ita rectius opposita sunt , evidentius perspiciamus , quod cuivis ex-  
perimenti cum genuina ratione experimenti MARIOTTEI patebit :  
nimirum sinistra chartula cum non nisi dextro oculo sibi obver-  
so bene respondeat , sinistro , præcipuè propiori , averfa & hinc  
invisâ



invisa erit ; eidem autem longius remota , radiorum oculum illabentium increfcente ambitu denuo conspicua evadet.

§. 8. Quemadmodum autem maxima difficultas , quâ hypothefin de visûs ratione hætenus à nobis traditam premi nonnullis creditur , in eo confistit , quod eô modô quæ erecta nobis videntur , in oculo tamen inverfa , & contra , depingantur : Itaque ejus rei diverfi diverfi modam explicationem adornant , qualium fasciculum brevem apud *BARTHOLINUM l. c. p. 352.* videre est : nobis illud imprimis maximè optandum videtur , ut animæ vel sentientis tantummodò natura & agendi modus exactius cognitus , imò vel cognoscibilis faltem effet : cum dubium nullum fit, quin tum non huic modo , verùm longe gravioribus adhuc aliis dubiis difficultas omnis facillimè excuteretur : Ut pauca excerpam, quis intelligendo penetrat rationem , qua objecta foris visa, non autem intra oculorum cancellos videantur ; quâ spatiofiffimæ moles breviffimo ambitu oculi capiantur & à minimis etiam accuratè diftinguantur ; quî uterque oculus fimplici modo videat ; caufatio enim conjunctionis utriusque nervi optici impertinens eft ; aliquibus animalibus difjuncti nervi funt & tamen fine dubio fimplex visio ; imò levis unius oculi diftorfio duplicem reddit, quod illa conjunctio non cavet. Scio quidem effe qui iftas res magis judicii quam fensus negotium fore credunt , an autem fuo pte judicio hic fatisfaciant ipfi viderint. De motu quidem quod plus judicii quam visus operam poftulet , fatis conftat, nobisque mox probabitur, de ceteris autem non item. Omnis lis perorata foret, fi modo Antiquitas Visus emanationem fine omni dubitationis alea nobis probatam dediffet. *MARCI MARCI* fubtiliffimi Philofophi & Medici Principiis imbuti facile ad hæc cafta tranfient, quibus replicationes , feu immanentes emanationes & diastaticæ actiones utraque manu recipiuntur. Annotant animæ noftræ in cerebro centraliter residenti emanationes in corpore noftro folenniffimas fore & in omnibus partibus vigere. Imo etiam extra corpus noftro : rariffimum quidem , tamen verum, quod aliquando avulfa etiam membra nihilominus dolere aliquandiu perfeverent : quod à *CARTESIO* obfervatum recenset *ANTON. le GRAND. in Inf. Phil. part. III. art. 7. p. 305.* fimilimam hiftoriam notat



notat *EXSERUS* in *Obs. Cultro Anat. annexis*. Ne dicam de radiis oculorum incantatriceibus, item perspicilla perforantibus de quibus *BORELLUS C. III. obs. 1. § 67*. Qui hæc descendere animum induxerit, ei *Laterna Magica* exemplum cui concava retinæ fabrica & alia mirè respondent, innumopere serviret.

§. 9. Quod autem motum attinet, de quo heic nobis maximè inquærendum est, constat sane, id quod jam dixi, eum magis judicari quam videri. Neque enim nisi mediante corporis moti comparatione ad reliqua, à quibus imago ejus in oculo hæc vel illæc removetur, siquidem oculus in reliqua ista paulò constantius intueatur; quemadmodum contrà, si oculus noster idem corpus motum sequetur, ex ipsius (oculi) motu de corporis visi loco motione, vel ex sola consuetudine judicatio confestim præsto est. Ita dum currum è porta evedum cernimus, si in ipsum oculus constanter dirigitur, oportet ut eum quoque sequens locum mutet: si verò in portam, imago progredientis currus in tantum, proportionaliter removetur in diminuta illa pictura, quantum ipsemet Currus revera amplius spatium à porta post se relinquit: Interim tamen & portæ ipsius currus progredientis eadem figura est, nisi quod, dum amplius recessit, obscurior sit, atque erat antea, dum portæ adhuc vicinior esset. Hujus itaque (nempe currus) perceptio visionis actio est: illius verò, (nempe quod currus progrediatur) cum ex sola spatii semper crescentis cum præterito, item corporum aliorum cum aliis semper quasi interpositis, comparatione; vel ex ipsius oculi situ mutato, enascitur.

§. 10. Atque hinc est, quòd judicium in iis circumstantiis, quibus adeò assuefactum nondum est, frequentissimè decipiatur, donec è noviter advenientibus, in subsidium quasi appellatis, errori Medicina pareatur: cujus generis est, si curru vel navi proficiscentibus totum illud, quod oculis unâ vice capi potest, moveri videtur: Ibi enim à nobis locum currus cum partibus suis verà non mutat; reliqua verò omnia cum alium, atque alium, respectu nostri, currusve (cui quasi continui sumus) situm acquirunt, & ex refractionis aliisque opticæ legibus simul in oculo imaginum suarum loca commutent, sic, ut tandiu moveri nobis credantur, quamdiu à judicio novæ circumstantiæ in auxilium.

non



non advocantur, v. g. quod alias fixa & immobilia esse illa omnia sciamus, quæ nunc moventur, neque ratio sit, cur nunc reverà moverentur &c. Ex opposito si in solem (tubis muniti) aut lunam, ubi inter amplum cœli spatium quasi sola cernitur, firmiter intuemur, tunc eam stare vulgò credimus; eò quòd tam promptè aliud ad manus nullum sit, ad quod comparatio Solis vel Lunæ quasi discedentis fieri posset; Oculi autem, qui interim continuò quidem ipsum sequitur, insensibilis & tarda revolutio, quam respectu ejusdem conficere necesse habet, prorsus non animadvertatur. Ita pariter, si duo currus insimul progrediantur, is qui altero illorum vehitur, alterumque intuetur, si eadem celeritate promoveantur, utrumque stare putabit: Si verò alter iste celerius promoveatur, suum quo vehitur, retrogredi: uti contrà, si suus, alterum retrocedere existimabit. Quod ipsum in navibus sine dubio longè meliùs animadverti potest, quòd in rhedis ex equorum motione iudicio ansa præbeatur, errorem suum celerius agnoscendi. Quæ tamen omnia in iis, qui sæpius ita proficiscuntur, pedetentim audiâ assuefactione, adeò obliterantur, ut postea arbores & id genus alia, utcunque reverà in oculo moveantur, ceu immota tamen, & ab ipsis post tergum successivè relicta contemplantur.

§. 11. Annotare verò hîc insuper conveniet, quòd ex iis corporibus, quorum motus celer est, præcipuè autem lucidis, continuus quasi & longus quidam in oculo intuentis tractus: & si circulariter moveantur, veluti circulus formetur, qui in tantò confusiores, imò tandem quasi evanidum degenerat, quantò motu intensiori, corpus illud agitur: cujus rei rationem aliam assignare non datur, præter hanc, quod spiritibus forte animalibus, qui interiori, & quæ incerebro peragitur, perceptioni ministrantur, illa ab objecti radiis conciliata quasi agitatio quædam paulò longiùs duret, neque tam citò iterum quietem sumat, ut unum quasi post alterum spatiolum, in quo corpus visum successivè reperitur, distinctè & singulatim apprehendi posset: Cum tamen reverà extra dubium omne sit, imaginem rei visæ in oculo semper in eodem saltem puncto representari, in cujus opposito ex altero latere eodem momento

B

reverà



reverà movetur. Sic dum facem v. g. extinctam, adhuc tamen candentem, paulò concitatus circumrotamus, integer in oculo nostro circulus lucidus apparebit, etiam si certissimum sit, eòdem momentò, quo facis illius candens extremitas ad dextram in aliquo puncto reperitur, eandem in sinisteriori oculi parte in puncto diametraliter quasi opposito depingi, non verò per integram oculi orbitam interiorem expansam esse. Quò etiam referri debet, ut alia similia plura prætereamus, quod ignes istos artificiales, quos vulgò Raqvettas vocant, longò quandoque veluti tractu igneo incedere credamus, seu in altum seu per lineam transversam horizontaliter moveantur.

§. 12. Probabiliorem adhuc istam impressionis spirituum semel susceptæ aliqualem durationem reddit vel id unum, quòd vulgò constat, si in lucem aliquam vegetam, vel probè saltem illustratum quoddam attentius aliquamdiu intueamur, mox oculos vel antea nonnihil clausos, vel etiam immediatè in aliud quoddam minus illustre convertamus, tunc quasi lucis quandam speciem, satis diu nobis obversari, & super objectum novum expandi, adeò ut sæpè non parum incommodi creet; cuius certè alia ratio dari vix potest, nisi hæc, quod spiritus ab illo antea jam impresso motu adhuc agitati, nondum in eam quietem concesserint, ut noviter adveniienti debiliori quasi concitationi locus adeò facilè esse possit. Paria in aliis quoque sensibus præcipuè auditu, qui visui magis congener videtur, fieri citra omnem difficultatem probare possemus, nisi prolixitatem nimiam studio evitaremus.

§. 13. Verùm ut nunc tandem ex iis, quæ præter opinionem longiùs à nobis producta sunt, ad scopum, cuius gratia tantùm prolata fuerunt, redeamus, & post cognitam naturalem motus in corporibus mediante visu perceptionem, etiam qua ratione præter naturalis illa vertiginosa, in qua corpora reverà quiescentia ceu commota apprehendimus, contingere possit, quàm possibile, investigemus: Patet ex hætenus dictis, causam quærendam esse vel in interiori oculum succingente tunicæ retinæ quasi velamento; quòd nempe nervosa illius substantia sub constantibus objectorum radiis quasi promota & subterfugiens novis semper succedentibus punctis novam impressionem suscipiat: quemadmodum



modum contra in naturali corporum promotorum apprehensione iidem radii progredientes ad nova semper quasi punctula appellant : Vel etiam secundo in ipsis spiritibus animalibus , qui motu locali inordinato concitati eandem speciem , quam semel susceperunt , non saltem diutius paulò retineant , sed insuper promotus illius ratione secum veluti circumducant.

§. 14. Prius quod attinet , retinam nempe motibus convulsivis vel propriis , vel à subjacente proximè choroide , vel undecunque demum agitatam , subter radiorum incidentium immobilibus extremis quasi protrahi , iisque semper novos atque novos fibrillarum apices admoveere , res ista primò quidem intuitu adeò improbabilis haud apparet. Ut enim de retina taceamus , quæ *WILLISIO* ab ipsa nervi optici substantia medullosa ac fibrata procedere dicitur , ut sit fibrarum nervearum , quæ illuc ( in nervo nimirum optico ) in unam fasciam colliguntur , quasi in velum reti forme expansio : ( de anim. brut. c. 15. p. 126. ) quod etiam aliquali in aqua calida maceratione manifestum fieri superiùs diximus : Choroidi certè tunicæ proximè subjacenti , quod sciam , nemo adhuc motum aliquem & fibras penitus denegavit : quemadmodum è contra ligamenti ciliaris ( quod pro illius parte agnoscitur ) fibrosis quasi filamentis crystallini humoris varia veluti transfiguratio , simulque pupillæ coarctatio & dilatatio à multis assignatur. Quin quod Choroides piæ matris propago sit , cum nervo optico cranium elabentis , quæ *WILLISIO* non tantum valdè sensibilis , sed & propterea spasmis & motibus convulsivis obnoxia putatur , *Anat. Cereb. c. 9. p. 47.* Ut dubitem , an non huc forte respiciant , quæ ibidem subjungit : *Quòd à majore ejus ( de pia meninge loquitur ) contractione paroxysmi epileptici , à corrugatione autem ejus minori & partiali immanes Cephalalgie , ac insuper interdum Scotomie , vertigines , & sæpe , nervorum origine in consensum tracta , membri aut visceris alicujus procul diffiti spasmi oriantur.*

§. 15. Verum enim verò , si hæc animo paulò attentiori intueamur , & præcipuè cum iis , quæ vertigine affectis evenire observantur , comparisonem instituamus , promptè elucescet , in illo quidem vertiginis genere , quod objecta ceu undulantia sal-



tem atque nutantia exhibet, convulsioni huic oculi interioris locum esse nonnunquam posse : At sit enormes istas omnium ob-  
jectorum, & totius illius spatii, ut sic loquar, colorati, quod oculum una vice occupare potest, in gyrum circumactiones : & in gyrum quidem horizonti magis parallelum, quam perpendicularem ; imò easdem perpetuò versus unam plagam, dextram v. gr. non autem huc illuc tendentes, & velut recurrentes consideremus : quis est, qui persuaderi sibi pateretur, parietes oculi interiores motu convulsivò in tantum posse circumduci, ut constanter, v. g. à dextris coni illius radiosi basin magis magisque antrorsum subterfugiant, à sinistris contra nova semper accessione illi identidem retrorsum subtendantur, neque tamen intereà sui quādam restitutione, & ad principium illud, à quo violenter emoti erant, ad instar reliquarum partium convulsivo motu agitatae, regressu opus habere : ut gratuitò taceam, quæ de artibus satis tunicarum invicem connexionem, oculique intra musculos & orbitam suam firmā adhæsiōem addi insuper possent.

§. 16. Restat igitur haud dubiè, ut cum WILLISIO tandem pronunciemus, *quod hemisphaerium visibile rotari videatur idèò, quia spiritus speciem excipientes circulariter moventur* : ( *de anim. brut. c. 7. p. 204.* ) Idque probabiliter modò non aliò, atque diximus, dum nimirum integri eorundem quasi manipuli (ut cum WILLISIO loquamur) motus illud genus, quod à radiis ob-  
jectorum visibilium susceperunt, etiam in perturbata sui circumrotatione aliquandiu conservent, sibiindeque noviter recepto alio continent. Evidentiora hæc sunt ex iis vertiginibus, quæ à corporis circumrotatione inducuntur, & quæ curru aut navi ve-  
stis supervenire solet : quis enim ab his convulsionem quamcunque excitari posse faciliè crederet ? Quin potius probabilissimum cuivis videbitur, spiritus animales non tantum visui ad-  
ministrando intentos, sed & qui musculationibus præfunt, imò fortè reliquos etiam, motum illum circularem & rotatorium, quem in hac corporis circumagitatione partim perficiendo, partim patiendo acquirunt, diutius paulò continuare, atque sic antequam ad quietem & pristinum ordinem reducantur, quemcunque impulsu quasi in itinere susceperunt, eundem secum etiam

nonni-



nonnihil circumferre : quod ipsum in nullo cæterorum sensuum æque notabiliter, ac in visu animadverti potest.

§. 17. Clarum ergo est ex his, quid persuadere nobis poterit, ut vertiginem, quemadmodum fecimus, imaginativæ facultatis depravationem, & eam quidem à spirituum animalium inordinato motu quasi circulari, dependentem, superius diceremus : Quem cum non parum sæpè eorundem per vias suas intercepta libera commeatio, & tam in nervum opticum, quam cæteros, qui oculi partium tonô debitô conservandô subsidaria quasi clateria spiritiosa adducunt, irradiatio subinde sufflaminata comitetur, exinde fit, ut & luminosi visibilium radii nec debitè illabi possint, nec inveniant etiam, quod actionem ipsorum subtilissimè, ut sic loquar, agitativam, imprimi sibi pateretur, & in oculis tenebræ & obscuritas plus minus interruptæ, aut totales etiam sentiantur.

§. 18. Pariter etiam patet, subiectum Vertiginis immediatum nobis iterum cum *WILLISIO* c. l. p. 106. esse spiritus animales, quos unusquisque hoc affectu laborans valde perturbatos susque deque oberrare persentit. Subiectum verò mediatum illæ cerebri partes sunt, in quibus imaginatio & sensus communis resident, & unde in genus nervosum proxima via ducit. Siquis autem hæc ulterius progrediendo in specie corporibus sic dictis callosis striatisque cum eodem *WILLESIO* tribuere : aut cum du *HAMEL* *Phys.* part. 2. tr. 2. quest. 3. p. 87. & quest. 4. p. 99. in corticali & cineritia cerebri parte imaginum habitacula : & ex adverso in callosa seu medullosa sensuum internorum sedes locare voluerit, ei non erit, cur in re obscura litem moveamus : nisi quod nec ab ipso pro confirmatione sententiæ suæ aliud quid præter leves quasdam conjecturas, fatente id ingenuè du *HAMEL* p. 87. & 88. nobis polliceamur.

§. 19. Causam itaque Vertiginis proximam & immediatam inordinatum & quidem rotatorium quasi spirituum animalium motum esse, in antecedentibus eruimus : aliquando plus minus interceptum : imò si mavis quandoque etiam oculi tunicarum interiorum nonnihil convulsivum. Propinquæ autem, Mediatæ, & Remotiores fieri pro diverso respectu diversa possunt : Quarum causarum integrum cœtum sub classes aliquot distinctioris



contemplationis ergò, redigemus, ita, ut aliam occupent illæ, quæ internæ sunt, & in corpore ipso malo huic originem subministrant, cæque vel in cerebro, vel extra cerebrum in reliquis corporis partibus, vel certo respectu etiam in toto: aliam extra corpus nonnulli ob id externæ dicendæ: aliam tandem illæ quæ ab extra corpori adveniunt quidem, intra id ipsum tamen nocivam suam energiam exercentes.

§. 20. Cerebrum ipsum quemadmodum unà cum Cerebello & continua medulla spinali partium corporis viventis, Hippocratico verbo *ἐνοργανῶν* i. impetum facientium elaborationi & dispensationi vacare jam inde à primis Medicæ artis, imò naturalis scientiæ incunabulis indubitatum fuit: Ita vel sua sponte ex hoc consequitur, quod pro diversa ipsius texturæ constitutione utraque istarum functionum vel benè vel malè quoque peragatur. Cumque jam satis probabiliter ab aliis præter WILLISIIUM *Anat. Cereb. c. 10. p. 50, 51.* assertum sit, generationem spirituum in ipsius substantia corticali, & in medullari eorundem, distributionem administrari; cum præcipuè in istam immediatè vasa sanguinem arteriosam advehentia plurima & pro usibus cerebri privatis omninò nimia inserantur: Insuper corticalis ejusdem substantia à MALPIGHIO & FRACASSATO pro minutissimarum glandularum congeriè habeatur, quæ per exactius microscopium visum etiam non subterfugerent. Medullaris autem substantia ramulis & fibrillis quasi minutissimis in eundem corticem dispergatur, & post velut arctius iterum collecta in nervos per integrum corpus evagantes distribuatur. Adeoque vero proximum est, ætuosa ista & subtilissima corporis nostri principia una cum sanguine per arterias in corticem cerebri allata, ibi præcipuè forsan per modum quendam translationis secerni, atque ulterius per medulloas partes quascunque vias agitata, ætus istos abstrusos, & usque adeo impervestigabiles exercere: Fluitque ex his ultro, si vel corticis illius, qualiacunque sunt, organa, vel hujus etiam medullæ viæ quicquam vitiosi patiantur, ut v. g. à colluvie serosa ipsas infarciante, vel ab ipsarum proprio etiam nutrimento minus sincero, necessario exinde generationem spirituum aut insufficientem aut minùs sinceram: hinc eorundem



rundem vel per vias insolvetas & indecentes motum : vel interceptum influxum : aut ex conatu quasi antiqua itinera iterum expediendi , diversimodè perturbatas agitationes enasci. Ut adeo huc quoque referri possint illæ cerebri læsiones , quæ per contusiones , concussiones , lapsus ab alto , heterogenea in ipso nascentia &c. inferuntur. Ita Hippocrates Epidem. 5. virginem quandam levi manu percussam mox in vertiginem incidisse perhibet. Item DEODAT. in valetud. p. 171. exemplum cujusdam affert, cui à lapsu ex equo vertigo, & huic tandem Apoplexia supervenit. Pariter folliculum aquosum, quem in fæminæ cujusdam post mortem apertæ cerebro, quæ Vertigine ex contusione syncipitis natâ laboraverat, & tandem Apoplexiâ interierat, repertum annotavit SCULTET. *Armat. Chir.* 23. depravatam cerebri digestionem privatam partim consequi potuisse, partim etiam eandem & spirituum inordinatum motum adhuc amplius gignere in aprio est.

§. 21. Causæ enim mediatae proximioris atque continentis vices omnino etiam subire potest spirituum non saltem in quanto deficiente peccatum, sed & in quali : id est, ipsorum crasis per particularum heterogenearum & nonnunquam velut hostilium, quocunque vel cerebri vel sanguinis errore factam intermissiorem, vitiata : Quare & ipsi postea de facili turbas pro re nata majores vel minores patiuntur. Imo addi hîc suo quodam jure affectus animi possulant, quorum quantum cum corpore, sine dubio spiritibus mediantibus, commercium intercedat, è risu, lachrymis, erubescencia ; pluribusve insignioribus ejusdem alterationibus, hos perpetuo comitantibus, vulgo jam est notum. Imprimis affectum hunc gignere observatur (præter curas & meditationes serias, studia immodica, iramque nimiam, quibus spiritus mirè perturbantur & absumuntur) timor & terror : quippe qui omnino in quibusdam ex alto prospicientibus, item suo modo in paucis in sublime intuentibus, ipsis non semper advertentibus, intercedit, & vertiginem in non assuetis excitare solet : Quod spiritus de subito ex idea rei adeo incongruæ quasi confusi rationibus relictis in motum erroneum cecantur, qui, quod visus ut plerumque, ita & hîc inter sensus externos fuerit occupatissimus,



mus, in illo etiam primo & præcipue effectus suos edunt: quod nostris ita exprimitur: *icherschrack / daß mir börn und sehn vergieng.* Unde assuetis tale quid contingere non observamus, nec iis, quibus vel ebrietas quandoque vel propria quædam naturævis, imminens & facile possibilis periculi omnes circumstantias simul qua si ob oculos mentis poni non permittit: id quod de brutis etiam suo modo intelligendum esse verisimilitudine non caret.

§. 22. In reliquis corporis visceribus extra cerebrum, quibus secundum primæ classis locum destinavimus, occasio huic malo non parum sæpe propullulat. Nam si quando in his particulæ v. gr. acres, acidæ, irritativæ, &c. vel ibidem generatæ, vel aliunde advectæ, nervorum, quibus instructa sunt, propagines variè vellicent atque rodant, tunc motus iisdem impressus hostilis partim in cerebrum usque propagatur, partim spirituum largam profusionem, ad expellendum quasi naturæ adeo adversum excitat. Quorsum referendum esse non dubitamus, quod in hypochondriacis, item senibus, aliisve quibusdam à stomacho Vertigo in tantum dependere possit, ut, quam diu jejuni sunt, cō afficiantur, mox autem à pastu, & vel frustulō panis comestō iterum desistat, vel ad minimum notabiliter remittat. Spectant huc vermes quoque in intestinis: Calculus in renibus, vesica, quale exemplum de Mercatore quodam *vid. Inst. Mæb. p. 258.* Excernenda præternaturalem moram in receptaculis suis trahentia, ibidemque malignas tandem qualitates suscipientia; & sic quoque hæmorrhoides in assuetis suppressæ, juxta *HIPPOCR. Coac. prenot. c. 13. text. 2.* item sudor & urina suppressi &c. Imprimis autem animal illud in animali, ut *HELMONTIO* audit, uterus muliebris symbolum suum uti penè ubivis, ita & hīc insigniter confert: Unde hystericae quoque passionēs in quamplurimis à Vertigine tragœdias suas ordiuntur, quale exemplum legere est apud *BORL. de Colorib. Part. I. c. 2. p. 7.*

§. 23. Quod si vero eorundem viscerum organica constitutio notabiliter læsa fuerit, ut munere suō, quod in elaboratione utilium corporis succorum cuilibet de jure naturæ suæ competit ritè defungi non possint; interea tamen, quod in præcedente quodam



quodam digestionem erratum fuit, id in subsequente adeo prompte iterum emendari nequeat; Exinde fit, ut sanguis heterogeneorum admiscelâ non ritè liberatus, ordinarium ac harmonicum illud partium, è quibus compositus est, temperamentum obtinere non possit, sed modo excrementitia feri inutilis colluvies in eo coaccervetur, modo terrestriores & fœculentæ particulae abundant, modo acidi, styptici, alique id genus infesti saporis naturalem ejus dulcedinem depravent, modo nimis volatiles, urinosa atque sulphurea heterogeneitates fermentativum ejus motum in gradum præternaturalem intendant: (qualia diversa in diversis Cachecticis, Scorbuticis, Hypochondriacis &c. contingere vulgò jam in schola Medica est notum) Unde sanguis, qui cerebro purior atque sincerior advehendus fuisset, ut ibidem actuosissima & viis suis à natura formatis proportionata pars succedere juberetur: nunc impurus, & justo mox segnior, mox concitior, spiritus aut parciores, aut variis certè inquinamentis conspurcatis suppeditare possit: Ut dein pro diversa ejusmodi spirituum modificatione, diversa quoque eorundem mala & turbas oriri non sit cur miremur. Quemadmodum verò causa hæc suo modò toti corpori adscribi potest, cum sanguis, qui hic cum vitiatum accusatur, illud undiquaque perrepat: ita referri ad tertium hunc primæ classis locum plethorica ipsius sanguinis abundantia potest, quâ, dum vasa, accedente insuper quandoque sanguinis ipsius rarefactione præter modum distenta sunt, cerebro, spirituumque viis facile inordinationem conciliare possunt: Et è contra quæcunque laudabilium corporis humorum quasi universalium deprædationes insigniores; ut hæmorrhagiæ nimia, feri & sanguinis quandoque per alvum immoderata excretiones, in Diarrhæis, Dysentericis: Menstrua prodigè nimis fluentia: Venus tandem immodica (de qua vid. FOREST. l. 10. obs. 48. schol. p. 371. a.) malo huic occasionem suppeditare possunt, Somni quoque & vigillarum usus uti moderatus non spiritus saltem sed totum quoque corpus in eorumque sua conservat: ita immoderatus contra hic (de vigiliis loquor) spiritus nimium depascit: illic (scil. in somno) eandem torpidiores reddit, & massam sanguineam inutilibus &



excrementitii humoribus augeri facit. Quod idem de motu & quiete hūc non inconcinne revocandis tenendum.

§. 24. Extra corpus multa quoque hoc nomine accusanda sunt. Ita vectio in curru, in navi, nimirum in nondum assuetis: prospectus ab alto; in aliquibus etiam intuitus in sublime & vacuum veluti spatium, ubi dum visio velut nullibi terminatur, terribilis quasi tam vastæ altitudinis idea spiritus in momento confundit. Item in nonnullis in vertiginem alias pronis usque adeo aspectus quoque rerum vehementi motu circulariter agitarum, uti rotarum majorum &c. (vid. FOREST. c. l. p. 370. b. § 371. b.) quem non aliter, atque iis, qui curru vehuntur, ut in superioribus explicatum est, vertiginem excitare verissimum putamus. Quibus peculiares Astrorum influentiæ magni sunt, ii in hanc forte classem easdem poterunt locare, utut nobis ob incognitam plane adhuc Astrorum naturam, & ob principia scientiæ Astrologicæ alia adeo infirma non facile videatur certi aliquid definire.

§. 25. Ultimæ tandem classis præcipuum locum Aër cum alimentis merito occupat: is enim non tantummodo ut ambiens, in transpirationis insensibilis negotio moderando plurimum potest: Sed & dum maximè in pulmones recipitur, ut inibi una cum particulis, uti cum recentioribus conjicere fas est, elasticis, nitrosis & fermentativis sanguini commisceatur, & eidem novam quasi vitalitatem addat: prout particulis plus minus spirituum nostrorum naturæ congeneribus aut hostilibus foetus est, ita commodum quoque aut detrimentum, utrumque insigne, afferre potest. Is enim primò eodem simul momento, quo thoracis cavum per muscutorum ipsius, diaphragmatis, aliorumque abdominis cooperantium actionem, dilatatur, & sic vacuum quasi fit, (siquidem viæ superiores per os aut nares, patulæ sint.) per asperam arteriam & ipsius bronchiales ramificationes proprio potissimum pondere quæqua versum premente in vesicularum pulmonum substantiam irrui: Deinde ibidem sanguini è dextro cordis thalamo per arteriam pulmonalem advecto, partem sui commissam relinquit, paulo post per venam pulmonalem in sinistram simul avehendam, & hinc per universam



tam corporis structuram porro distribuendam. Ut adeò intel-  
 lectu haud difficile existat, quam sava corporis nostri œconomix  
 mala incommoda conciliari possint, si quando cum ipso pere-  
 grinos hospites & inimicos, vapores nempe & effluvia sangvi-  
 nis nostri texture improporcionata irrepere contingat. Ita si  
 Gas quoddam acre, acidum & stypticum &c. secum vehat,  
 quale est e.g. fumus carbonum, aliive arsenicales & venenati, ut  
 illi in metallifodinis, inde vasorum trachæalium quædam quasi  
 convulsiones, sanguinis intra vesicularia illa diverticula plus  
 minus inspissati aut coagulati etiam stagnatio, hincque circula-  
 tio impedita: imò tandem sanguinis etiam talibus inquinati in  
 cerebrum, pro spirituum materia, & in reliquas corporis offici-  
 nas pro nutrimento aliisque usibus, distributio: atque sic ex  
 his omnibus plurima spirituum systematis detrimenta, synco-  
 pes, convulsiones, suffocationes hystericæ, Apoplexiæ, Verti-  
 gines quoque, de facili enasci possunt. Quorsum & ea quoque  
 annumerari merentur, quæ spiritibus nostris per olfactûs sensum  
 tam bona quàm mala inferri possunt; cum is non tantum à re-  
 spiratione insigniter dependeat, quâ nempe particulæ odorife-  
 ræ mediante aëre per nares transeunte, organis olfactoriis effi-  
 caciter alliduntur; sed & immediatum magis cum spiritibus &  
 cerebro commercium communicativum exercere videatur,  
 pro ut eleganter declaratum est ab Excellentissimo Dn. BOHNIO  
 Patrono & Præceptore meo ætatem honorando, *Disput. 19.*  
*Physiol. de olfactu §. 14.* Et talium censu omnino floris Africani  
 odore est; quem vel solum Vertigines, Cephalalgiam atque E-  
 pilepsiam gignere ex Autore Anonymo in Dodon. asserit SIMON  
 PAULI *Q. B. cl. 3. p. 304.* Pariter si velis addi possunt illa, quæ  
 fœminis peculiariter, aliis svave- aliis graveolentia, hystericas  
 passiones, & earum sæpe prænuntias Vertigines excitare ob-  
 servantur.

§. 26. Quæ per os assumuntur, & in specie alimenta, quod  
 concernit, possunt ea insignissimè quoque inordinatæ & verti-  
 ginosæ spirituum commotioni originem multimodis præbere.  
 Nam si eadem vel quantitate dyspepta sint, multum spirituum  
 pro digestionem sui insumunt: Ventriculum & intestina gravant:



nonnunquam flatulenriâ , acore & aciditate hostili, seu ab extra  
secum allatâ , seu per diutinam moram & fermentationum dige-  
stivarum errorem intra corpus contractâ , nervos in liisq; con-  
tentos spiritus variè laceſſunt : chylum , atq; exhinc sangvi-  
nem ipsum adulteratum reddunt : fermenta reliquorum visce-  
rum corrumpunt : atque sic ubivis spiritus vel in quanto minui ,  
vel è materia inepta atq; vitiata generari faciunt. Cujusmodi  
à cepaceis , alliaceis , lolio , nasturtio , raphano-rusticano, pipe-  
ratis &c. sæpe contingere , quotidianâ experientiâ abundè do-  
cemur. De pomis , ex fructuum horarum censu , immedica  
comestione Vertiginem gignentibus , exemplum è C A S P.  
HOFFMANNO affert modò laudatus S. PAULI Q. B. d. 2. p. 81.  
Eibid. præcedente p. 79. de lupinis, in verminante puero præ-  
ter intumescentiam abdominis insignem , tormina , tenebricosam  
vertiginem & tandem Epilepsiam introducentibus. De ebrietate  
& Tabaci fumo (quem Nostratium jam satis diu firmata consue-  
tudo quasi in alimentorum familiam adscivit) in non asuetis qui-  
busdam res vulgò jam est nota : Unde FORESTUS per diuturnam  
experientiam edoctus pronuntiat, ebriosos facillimè in vertigi-  
nem incidere vid. l. 10. obs. 44. in schol. p. 272. b.

§. 27. Claudere tandem hanc classem possunt , quæ corpori  
nostro vel per os quoque , sed non ut alimenta , ingeruntur :  
vel utcunque demum in idem penetrant. Ita ex illorum nu-  
mero , præter Vomitoria , à quibus nonnullos immani vertigi-  
ne correptos W I L L I S I U S de Anim. bruto. citat. loc. p. 206.  
annotavit : De purgantibus notum est , confirmante FORESTO,  
si intempestivè aut largius propinentur , ea Vertiginem haud ra-  
rò atrocem procreare : non tantùm , quod spiritus & humores  
corporis laudabiles , si in excessu peccetur , insigniter minuunt ;  
sed & quod particulis plus minùs sæpè malignis sanguinis & spi-  
rituum quoque diataxin non persunctoriè turbent. Cujus rei ex-  
emplum è Rhabarbari jugi per aliquot annos usu Vertiginem  
immedicabilem generante legere est apud S. PAULI Q. B. d. 3.  
p. 455. Cum enim purgantia , dum intestina transeunt , non  
solum substantiæ suæ acris & fermentativæ plurimùm per venas  
lacteas mesentericas , & ductum thoracicum cum chylo aut lym-  
pha



pha reliquo sanguini impertientur, atque sic eundem in motum fermentativum singularem & quasi colliqvativum ciant, prout eleganter à *WILLIS. Pharm. rat. part. 1. sect. 6. p. 58, 59.* Ecce deductum est: sed & reliquo suarum particularum quasi caucicarum, tum juxta *WILLISIIUM* c. l. pori biliarii, pancreatici & intestinorum interiores glandulosos villos: tum juxta *PECHLI- NUM de Purgant.* præterea plexus istos miliares glandulosos in tenuibus intestinis à *PERERO* exactius erutos, ad prodigam humoris lymphatici & serosi profusionem irritent: hinc facile omnino contingere potest, ut vellicatio ista, quæ sic nerveis intestinorum partibus inducitur, turbas suas in Cerebrum usque propaget: Imò ut particulæ istiusmodi forte una cum sanguine in spirituum officinas irruentes, pares inibi confusiones creent. Quâ eadem ratione haud dubie & singularem suam, quam adversus spiritus nostros cum profiteri vulgò notum est, hostilitatem etiam in Vertigine procreanda exserit, in iis non tantum quiniunctiones & ales vel patiuntur vel applicant, sed imprimis in his, quibus alias multum cum ipso commercii intercedit. Quàm enim iste corporis habitum pervadere possit, notum est illis, qui frequentius eum tractantes, postmodum vel solò digitorum affricu, aurum, cuprum &c. dealbare de facili possunt; Indeque tandem variis & multiplicibus nervosarum partium morbis, Vertigine, Apoplexiâ, Epilepsiâ, Paralyti, Tremore & Contracturis artuum &c. male quoque ab eodem muldantur. Peculiare quid, præter alia, de & ii & ii penetrabilitate ex *DRGBÆO* refert *BOECHERUS phys. subterr. l. 1. sect. 3. c. 4. n. 8. p. m 155.* quod nempe si quis in eum pollicem pedis immittat, ore autem coronatum aureum tenest, is à & io isto per corpus penetrante dealbetur. Cujus equidem rei fides penes Autorem à nobis relinquitur.

§. 28. Causas itaque Vertiginis hucusque fusius persecuti sumus, quarum ferè quælibet pro diverso respectu causæ mox mediatae propinquæ, mox remotæ, remotiorisve &c. naturam inducere apta nata est. Nunc autem porro ex omnibus antecedentibus differentias mali hujus eruere difficultate prorsus destituitur. Sic enim alia Vertigo per consensum est, seu sympa-



ethica & secundaria, quæ per modum symptomatis aliûs cuiusdam visceris morbum comitatur, qualis ea est, quæ Ventriculi aliorumque viscerum malis adjungitur : ut & illæ, quas WILLIS. *de Anim. brut. c. 7. p. 206.* à dolore acuto, ulcere & sphacelo in pede consitis, utut breves, obortas expertus est : Alia Idiopathica est, primaria, & per essentiam, quæ per se quasi morbum constituens, originem suam in Cerebro & spirituum animalium systemate agnoscit : Aliæ tandem mediò q. modò se habent, quales sunt, quæ Apoplexiam, Epilepsias, Hystericam passionem, proximè antecedunt aut inchoant. Iterum respectu gradus intensioris vel remissioris, alia objecta omnia quasi in gyrum agitata vel tremulo saltem motu undulantia exhibet; & hæc quidem faciliè iterum transit : alia insuper visus imminutionem & quasi obtenebrationem addit, propterea Scotomia dicta : alia tandem usque ad cò ingravescit, atque potentiam motricem simul in tantum lædit, ut nisi ægris derepente sustentaculo quodam firmari contingat, ipsi in terram concidere necesse habeant, quæ etiam ob id ipsum Caduca dicitur, & proximus ad Epilepsiam gradus est. Ratione durationis alia recens est & accidentalis, alia inveterata & habitualis : Alia continua, alia per intervalla affligens : Alia ratione temporis, interdiu, alia noctu magis molesta est. Quòd si verò quis differentiis pluribus, etiam ratione causarum, delectetur, ei non difficile fuerit, tot illarum cedere, quot superiùs causas à nobis annotatas inveniet, vel ipse etiam ulterius adjiciendas putabit.

§. 29. Neque in discernendo hoc mali genere ulla difficultas est, cum signa per se cuivis perspicua existant : Quò verò & illud dijudicetur, an per consensum ex alia corporis parte, malè affecta enatum sit, an essentialiter in ipsius cerebri mala dispositione quærendum : in subsidium vocare conveniet signa illa pathognomonica, quæ & cerebri & reliquorum viscerum indecentem habitudinem aliàs produnt : Ita v. gr. si sensuum vigor notabiliter depravatus sit ; si caput vehementi dolore ten- sivo, gravativo &c. affligatur, aut si id ab externa vi insigniter læsum fuisse innotescat : signum erit, fontem in capite ipso essentialiter hædere. Si autem varii ventriculi & intestinorum.

dolo-



dolores, appetitus dejectio & nausea, rugitus, ventris inflatio, ructus acidi & nidorosi flatusque frequentiores &c. urgeant, tum ad primas vias erit respiciendum. Et sic de reliquis.

§. 30. Prognosis quod attinet, observatum est, Vertiginem leviolem, recentem, & accidentalem ut plurimum periculo vacuam & curatu sæpè facilem existere: nisi fortè alia quædam signa peculiarem ad Epilepsiam vel hystericeam passionem dispositionem arguentia de illis non nihil jubeant suspicari: Diuturnior contra & vetusta, imprimis quæcunque gravior, tenebrosa & Caduca, citraque manifestas causas oborta, in senibus ordinariè Apoplexiam; in junioribus verò Epilepsiam frequentissimè prænunciat, non rarò etiam proximè & immediatè antecedit, in easque veluti degenerat. Imò in tantum ipsi quandoque cum Epilepsia convenit, ut annotante *SENNERTO Instit. l. 2. part. 3. sect. 1. c. 9. p. 333.* Vertigines vilæ fuerint, quarum accidentia adeò similia erant symptomatibus Epilepticis, ut vix dignoscerentur, & à Medicis dubitaretur, utrum Vertigines an potius Epilepsiæ nominari deberent. *Habitualis facta, utut levior, cum Therapiam non nisi diuturnam & valde difficilem admittat, sæpissimè & laborantem & Medicum ita fatigat, ut priusquam morbus sanari possit, alter alteri tediò fuerit, prout observat WILLIS de Anim. brut. c. 7. p. 29.* Cum quo tamen non adeò libenter convenerimus in eo, quòd Vertiginem habitualem & ferè continuam in genere discrimen ingens aut brevi imminens rarò minari dixerit: Cum omninò dispositionem ad facilem inordinationem spirituum arguat, nec sit cur securi simus, quin aliquando de improvviso accedente novâ quædam procatarxi degeneret in graviolem: de qua ipse mox subjungit, Vertiginem posterius ortam (intelligit autem circa corpora striata, ubi simul functio motiva læditur, quod fit in Scotomia & Vertigine Caduca) & spirituum in nervos irradiationes intercipientem valde periculosam esse, non rarò in Apoplexiam vel Paralyfin aut in morbos convulsivos transire. Contra verò ratione terminationis ex ejusdem *WILLISII* observatione Vertigo anterior, i. e. ut ipsi videtur in corpore calloso confita) quæ vix omninò *overcoming* aut Caduca est, magis tuta existit & inter-

dum



dum Medicinā tolli potest, quandoque fluxu hæmorrhoidali, aut hæmorrhagiānarium sponte solvitur, non raro etiam in Cephalæam commutatur. Qui etiam terminationis hujus mali modus ab experientia passim confirmatur.

§. 31. Restat nunc, ut ad mali nostri, quod hæcenus pertractavimus Therapeusin tandem deveniamus, cum eaque disputationi nostræ finem feliciter imponamus. In hac, cum multiplices quidem, uti Medicis vocantur, Indicationes, quid agendum sit, veluti postulent, omnes tamen & singulæ eò concorditer inclinant, ut aut causam ipsam proximam, spirituum inordinatum motum, aut mediatas propinquas, aut remotiores, prout nempe hæ vel istæ insignius peccant, aut remediis etiam promptius parituræ videntur, tollendas jubeant: adeoque ex iisdem, quæ causarum continentium, i. e. proximæ non tantum, sed interdum etiam propinqviorum quarundam rationem habent, auxilia ut plurimum in ipso paroxysmi tempore, sicque curatoria magis postulant: Quæ verò remotiores causas, & harum antecedentium quasi suscitativas respiciunt, eæ præservatoriè magis extra eundem tractari possunt ac debent. De omnibus autem in genere breviter, at eruditè *RIVERIUS Prax. Med. l. 1. c. 9. p. 99.* pronunciat, Curationem Vertiginis cum Epilepsiæ Curatione multum convenire, quod & ab iisdem propemodum causis uterque affectus oriatur, isque in hunc sæpius degeneret: nisi quod in Vertigine, ceu affectu, si ad Epilepsiam comparetur, longè leviori, minor etiam remediorum apparatus requiratur.

§. 32. Indicationum harum primam, nempe Curationem paroxysmi ipsius & causarum continentium remotionem quod concernit, præstare hanc possunt. Primo quæ spiritus nostros ex inordinato non saltem, quem vitiosè susceperunt, motu, in ordinatiorem & naturæ congenerem magis revocant, sed & quæ eorundem quantum deficiens svavi sua spirituosa & penetrativa substantiæ parte adaugent: Sic enim fiet, tum ut spiritus nostri novâ ista accessione quasi fortiores redditi, antiquas suas & solitas vias tantò efficacius ab impedimentis quasi purgent: tum ut per amicam istam fragrantiam spiritibus quoque nostris,



nostris, per nervos olfactui & gustui imprimis ministrantes, novum & proportionatum motum imprimant, sicq; efficiant, ut alter iste inconveniens & turbatus sensus iterum cesset atque obliteretur. Nam & alias dum sanâ & ordinariâ constitutione fruimur, suaveolentia ista & quæ gustu nos reficiunt, harmonicum spirituum nostrorum motum, quò tum gaudent, veluti intendendo, eorundem ovationes (ut cum WILLISIO loquamur) & nostri exhilarationem procreant. Hæc verò utraq; optimè sperare possumus ex iis, quæ *analeptica* aliàs appellari solent: qualia sunt omnia spirituosâ, odorifera, penetrantia, aromatica acriora non nihil & calidiora: imprimis fragrantissimum Cinnamomum, & ex eo parata  $\nabla$  spirituosâ, & ol., tam concentratum illud comune, quàm præcipue æthereum, quod istud in destillatione rectè administrata antecedit. Item huic admodum congener Costus Arab. verus cum ol. & essent. sua: Cardam. Cubeb. N.M. galang. Caryoph. aromatici imprimis: Item temperatiora, rosæ, fl. tunic. lil. convall. saly. meliss. anthos, lavend. puleg. serpill. &c. ex quæ his spir. per fermentationem aut infusionem cum vino aut spir. vini parati; & essentia, e.g. lavend. galang. ex oleis eorundem. Ex Animalî Regno Moschus & Zibethum, & illud ignotæ adhuc originis concretum, Ambra, cum omnibus medicamentis, quæ hæc ingrediuntur. Ita & ex his talibus compositi integri  $\nabla$  rum, essentiarum, spirituum, ballamorum confortantium, cordialium, antepilepticorum, apoplecticorum, hystericorum exercitus: è quibus Medico cordato non est difficile, pro circumstantiarum subinde variantiû ratione, quæ patienti suo magis appropriata judicabit, seligere. In mulieribus, si quæ fragrantium istiusmodi suaveolentium odorem infestum sibi sentiunt, ad aliâ minus gratè olentia, sed spirituosâ tamen & acria, imprimis Castoreum, illud utero peculiariter dicatum medicamentum, prudens Medicus progredietur.

§. 33. Reduci etiam sub hanc classem debent, quæ aliàs à Practicis quibusdam in ipso paroxysmo svaderi solent, acria, & nervosum genus vellicantia, ut Erichina, Ptarmica, frictions, masticatoria, & suò modò Clysteres etiam acres: utut ab iisdem ut plurimum intentione revellendi aut evacuandi humoris & vaporis peccantis à cerebro, præscribantur. Ex his fortè pro diversa circumstantiarum ratione usu suò non carent masticatoris imprimis, corporisq; frictions: non tantum quod utrinq; spiritibus motu inor-



dinato extra oleas q̄. vagantibus, per insignem ejusmodi sensori-  
orum commotionem & sollicitationem in ordinarias suas vias &  
irradiationes directas redeundi impulsus & ansa præbeatur; sed &  
quod per Apophlegmatizantia illa & Masticatoria serum è glandu-  
lis cerebro vicinis, atq; è cerebro forsan ipso, sicubi in illo scateat,  
copiosius emulgeatur, sicq; insuper affluxu sanguinis ad glandulo-  
sa ista seccernicula largiori concitato, ejusdem copiosior in cerebrū  
transitus simul nonnihil inhibeatur: ita fiet, ut reliquum, si quid  
fortè in plethorica habitudine cerebrum, stagnatione velut ortā &  
transitu difficiliori reddito, premat, eò liberius venosa capillamenta  
subire possit. Quorsum omninò & Errhina adhuc moderatiora con-  
veniet adijungere; imò fortiora etiam, nempe ptarmica & sternu-  
tatoria nostro judicio non planè hinc exulare debent; quod eadem  
virtute sua insigniter incisiva & acri quoque in glandulas narium,  
& cerebri in nares patentia ventriculorum excernicula immediatè  
magis evacuando operentur, sicque in tollenda cerebri per serum  
inutiliter coacervatum gravatione, Vertiginem sæpissime, nec rarò  
ipsam Apoplexiam gignente, auxilium non leve promittant: Utut  
eadem fortiora Ptarmica & Sternutatoria in iis, qui Vertigine la-  
borantes alias in Epilepsiam aut morbos alios convulsivos proni  
sunt, paulò circumspectiùs administranda putemus, quod insignem  
& dolorosum satis, quem excitant, tot musculorum respirationi in-  
servientium spasmodicum motum merito in talibus suspectum ha-  
beamus. Clysteres quod attinet, de his inferiùs adhuc dicetur.

§. 34. Postquam verò subinde suspicandum est, imò interdum  
etiam è convenientibus & partim superiùs datis signis innotescit,  
serosam in cerebro colluviem aut sanguinem quandoque ex parte,  
ob vias fortè excretorias, aliosque transitus per obstructionem  
qvandam denegatos stagnare, propterea scopo huic per volatilia  
discutientia, attenuantia, moderata tamen, & cum grano salis usur-  
panda, quandoque prudenter simul prospicietur: Ut adeò remediis  
istis superiùs datis non omninò præter rem sociaturi simus, pro  
exigentia nimirum circumstantiarum, salia volat. & spir. utcunque  
nonnihil empyreumaticos, ob id ipsum tamen scœminarum qua-  
rundam idiosyncrasiæ magis proprios, v. gr. succini, C. C., ebo-  
ris, cranii & sangv. human., liqv. C. C. succin., salia vol. oleosa  
temperatiora, spir. sal. armon. anis., lavendulat. caryophyllat.  
oleo rutæ, succini &c. imbutum, ess. myrrh. succin. bals. peruv.



Castor. spir. theriacal. c. ess. castor. &c. Quibus circumspiciē ad superiora additis fiet, ut præter usum illum jam notatum discussivum & attenuativum svaes insuper spirituosasque eorum partes copiosius ac intimius quasi evolvant, cum iisque tanto efficacius ad organa sensuum allidant.

§. 35. Pariter cum Vertigines per consensum ferè communissimæ sint, atq; conjunctam suam causam ut plurimum in Ventriculo agnoscere soleant, ubi acidum, viscidum aut aliàs malignum orificio ejus sinistro, & plexui, quo illud circumdatur, insigni nervoso molestum est, spiritibusque per nervos illos veluti radiantibus, pravam agitationem inducant; annitendum erit ante omnia, ut è Ventriculo hostile illud eliminetur, quò faciò Vertiginem sponte etiam cessare oportebit. Huic fini ut satisfaciat, siquidem de tali Ventriculi vitio vel è signis evidentibus, vel undecunq; demum, suspicio hauriatur, conveniet ante omnia, propinato blando plus minus, pro rei exigentia, Vomitorio, in ipso etiam paroxysmo, contentorum ejus excussionem procurare: Naturâ ipsa hanc viam monstrante, quippe quâ sæpius vomitiona spontaneâ institutâ malum illud solvitur; quemadmodum & in iis, qui à contracta per navigationem nausea & Vertigine non feliciter nisi vomitu procurato liberantur, videre licet: quod à *BORLÆO l. suprâ c. p. 6.* annotatum est. Materia vomitoriorum uti passim nota est, ita ex iis præcipuè liquida elegerimus, aut in liquida certè forma propinata: ut infusiones croci metall. vitr. ꝯ ii, ꝯ vitæ, per vina acidula, diligenter ante exhibitionem filtranda, ne quid particularum paulò grandiorum simul assumptum Ventriculo graves nimis turbas cieat. Ita & sapæ vomitoria & Emetici syrupi. E siccis, cum ꝯ vitæ rarò adeò benè & sollicitè præparatus reperiatur, quin moram aliquam in Ventriculo intentione diuturniorem & nocivam trahat, ex omnibus fortè tart. emeticum non immeritò seligemus. Omnia autem quæcunq; tandem eligantur, cum stomachicis blandis, nervinis & aromaticis sociari non abs re fuerit. Si quid fortè causæ in intestinis hærare, & exin per plexum præcipuè mesentericum turbas in cerebrum usq; propagari, suspicio aut indicium quoq; præsto sit, Clysteres ex emollientibus, & plus minus acribus, officium suum non segniter facient, infimum nempe crassumque intestinorum canalem (neque enim ultra Valvulam Coli probabiliter penetrare possunt) evacuando & nonnihil irritando, ut, si fortè superiora te-



quia nimio heterogeneorum & incongruorum infarctu graventur, motu peristaltico sollicitato, & viis expeditis, anto promptius depleantur.

§. 36. Sangvinem verò, quemadmodum in Plethoricis, aut aliàs quoque capillamentis arteriolarum & venarum insigniter impeditis, nocivam sui accumulationem pati, sicque distensionem, valorum & cerebri gravativam pressionem gignere posse superius annotatum est; Ita si tale quid in Vertiginoso subesse per regulatum *σχεσμο* assequamur, optimum consilium erit, V. Sine administratâ sanguinis massam in quanto minuere, & sic ei simul liberiores quasi vias præstare. ROLFINCUS certè *Meth. cognos. aff. part. cap. diff. 6. p. 26.* nobilis præsidii V. Sem esse ait in obstinata Vertigine, quæ diu duraret, & Apoplexiam vel Epilepsiam minaretur. Locum quod attinet, utut negotium circulationis sanguinis cum indifferentem reddidisse videri queat, non parum tamen propter hîc, ubi secta vena, accelerati, illuc retardati fluxus necessitatem (Revulsionem dicunt) referre per experientiam observatur, in brachione, an in pede eadem instituatur. In pede equidem venis apertis manifestum sæpe levamen capiti malè habenti accedere, aliquàm multi Practicorum experientiâ se doceri quotidie asserunt. Nec malè etiam è brachiis dextrum in capitis affectibus eligemus, quòd ejus lateris Carotis non immediatè ex ascendente Aortæ trunco, veluti sinistra, enascatur, sed mediatè trunco axillari implantetur, atque sic sanguinem, qui subclaviam intrat, dimidium quasi ad brachium, dimidium autem ad cerebrum deferri necesse sit, qui deinde viâ in brachio apertâ & sic laxiori factâ, tantò largiùs cò tendens, ad Cerebrum parciùs impellatur. Arteriotomiam certè in arteriis temporalibus, etiam in paroxysmo vehementi & diuturniori locum habere videtur ROLFINCIO l. c. qui idem p. 29. postquam illam retrò aures administrandam, auctoritate GALENI de cur. rat. per sangv. miss c. 22. § 3. loc. aff. c. 8. nonnihil confirmasset, ad suam experientiam provocat, prope tempora exilem arteriam sectam in Vertigine levamen notabile attulisse. In eundem finem arteriæ temporalis sectionem ex GALEN. l. c. DONAT. ab ALTOMARI de remed. c. 17. Massaria, Mercuriali in Pract. de Vertig. L. FUCHS. l. de morb. intern. 19. BENED. SYLVAT. in Consult. comendat D. MEZGERUS in diff. de Arteriotom.

§. 37. Ordine tandem ad Specifica vulgò sic dicta medicamenta de-



ta deducimur, t. e. talla, quæ adversus hoc morbi genus nobili auxilio esse observata sunt, utut de eorum operandi modo proximo & genuino ratio reddi sufficiens nondum possit. Sub horum censum multa hinc inde relata deprehendimus, quæ tamen dubitationem nostram non injuriâ merentur: Quemadmodum è contra alia nonnulla bonâ ratione suffulti locò suò omninò digniora judicamus. Ita certè quod alicubi commendatum legimus falsciuri, ob propriam qf. (hæc enim ratio addebatur) signaturam, dum nempe animal istud citrà ullam Vertiginis notam per arbores hinc inde transilire observemus, admodum suspectum nobis videtur. Nescio quoque, an non idem judicium Ciconiarum pingvedo, cum aliis quibusdam, vulgò hic commendari solitis, subire debeat? Contra autem Specifici nomen, utut vocabulò nonnihil latè sumò, ad quasvis propemodum spirituosæ systematis inordinationes, in specie Epilepsiam & Vertiginem, jure optimò mereri Cinnabarim, tam nativ. quàm facitias, imprimis ꝯ ii, ob præparationem & purius ꝯ ii sulphur., experientiâ quotidianâ plus satis comprobatum existit. Imprimis *Excellentissimo Dn. D. Lujæ, Practico Lipsiensis longe famigeratissimo, Patrono & in Praxi Manuductori meo omni grata mentis cultu etatem venerando*, inter secretiora hoc in morbo numerari Cinnab. ꝯ ii cum sale volat. viperar. & extr. castor. combinatum ex ejusdem benevola communicatione mihi innotuit. Eodem nomine sterco pavonum uti in Epilepsia, ita & Apoplexia & Vertigine quoque passim à Practicis dilaudari legimus, præsertim ap. *Quercet. Pharm. p. 420. item Borell. cent. 3. dis. 25. p. 210. &c.* Aliàs radicem Doronici & auric. ursi fl. flavo, commendant, quod & Damarum, aliique venatores & montium accolæ, quibus plurima præcipitia & invia adeunda sunt, iis sese muniant, & ob id ultima peculiari nomine *Krafft, und Schwindelwurh* dicatur, vid. *JENNERT. Pr. l. i. part. 2. c. 4 p. 274. & Sim. Paul. Q. B. cl. 2. p. 26.*

§. 38. Reliquam tandem Therapeuticam partem, nempe Præservatoriam causarum remotiorum & morborum, à quibus Vertiginem symptomaticè metuere convenit, sublationem quod spectat, eandem susciùs exequi velle, esset integras tot morborum curas scribere, quot eorum superiùs partim adduximus, partim tacitè subinnuimus. Illæ igitur aliunde & propriis suis locis petitz, si rectè administrentur, sublatò fomite omninò & malum hoc inde propululans disparebit. Fiet hoc imprimis pro diversa circumstantiarum ratione



ratione per diversa Incidentia, attenuantia, discutientia, absorbentia, & communiter sic dicta  $\overline{\text{U}}\text{tia}$ , quorum usum verum à sero abusu solidissime nuperius vindicavit *Excell. Dn. D. ETTMÜLLER, Fac. Med. Lips. Ass. & Prædicus ibidem celeberrimus*: Cinnabarinis, succinatis & castorinis combinanda: ut & per evacuationes sanguinis, seri & excrementorum vel Universales vel Particulares, ordine & ritè institutas: In specie autem illas, quæ non unâ vice, sed successivè & pedetentim fiunt; sic enim natura ad excretionem in eo loco qd. nonnihil assuetâ materiam morbificam proprio nisu separatam, tanto promptius extra corpus proscribit. Tali nomine Fonticulos opem haud rarò non spernendam attulisse Prædicatorum observata habent. *GUIDO tr. 7. doctr. l. c. 3. f. 119.* Medici cujusdam meminit, qui per setacum diu apertum servatum Maniacos, Vertiginosos & Scotomicos curavit. Vesicatoria & Cauteria capitis elatiori sedi, vel post aures, aut in Cervice applicata commendat *PLATER Pr. l. 1. c. 7. p. 352.* Cauterium autem syncipiti admotum maximè laudatur à *Zac. Lus. l. 1. Pr. admir. obs. 28.* §. 39. Diæta ægroti nostri constitutionem ejus hæc vel illâ ratione morbificam sequitur: In genere autem talis esse debet, quâ spirituum systema novô subinde & homogeneô accessu per alimenta assveta, boni succi, facilis digestionis, & ordinatè assumpta: Motûs & Quietis, Vigiliarum & Somni moderatum, prout cuilibet aliter atq; aliter magis è re fuerit, usum: Affectuum neq; excedentem neq; defectivam indulgentiam: atq; id genus plura vulgò ad nauseam nota, & pro diversa subjectorum habitudine varianda, augeatur: Quod ut promptius fiat, subinde simul medicamenta condita, Eleduaria, Trageæ &c. interponenda, svaveolentibus, & caput confortantibus externè cucuphis, pomis odoriferis &c. utendum. Quò tandem nescio, an tuta fide referenda sit CrySTALLUS apensa, aut potus è poculo crySTALLINO, referente id ex aliis *PLATERO l. c. p. 246.*

§. 40. Sed jam nimis longè processimus. Te B. L. si qua fortè ad palatum tuum minùs fuerint, rogamus, ut illa nihilominùs æqui bonique consulere non dedigneris. Esto igitur DEO T. Opt. Max. æterna Gloria: Huic autem Disputationi felix